

Warga UMP harus ambil iktibar daripada krisis ekonomi global

– Najib



Perhatian seluruh dunia pada masa ini telah tertumpu kepada soal krisis kewangan yang sedang melanda Malaysia. Krisis kewangan yang melanda Malaysia telah bermula dengan krisis sektor sub-prima (*sub primer sector*) di Amerika Syarikat dan melarat kepada krisis sistem kewangan di AS dan Eropah dan daripada krisis kewangan akhirnya menjadi krisis ekonomi dunia yang paling serius dan dahsyat sejak era deprasi pada tahun 1930 dahulu.

Timbalan Perdana Menteri, Yang Amat Berhormat Dato' Sri Mohd Najib Tun Haji Abdul Razak berkata, sebagai warga universiti, perkembangan seperti ini harus diambil iktibar dan bertanya pada diri sendiri bagaimanakah dan apakah implikasi daripada krisis ekonomi global ini ke atas diri kita.

"Kepada kita, sama ada implikasi atau hubung kaitnya ialah untuk kita memahami apakah sebenarnya punca krisis ini, baik kepada sistem mahupun *content* dalam pengajaran kita di dalam kurikulum-kurikulum di universiti dalam sistem pendidikan kita yang sedikit sebanyak boleh memberi pengajaran dan mungkin membawa kita untuk mengkaji semula ataupun melakukan penambahbaikan kepada fahaman kita terhadap apa yang telah berlaku mutakhir ini.

"Oleh itu, salah satu daripada pengajaran daripada krisis ini ialah bahawa kita perlu ada pemikiran baharu dari segi ideologi, kefahaman tentang apakah sistem yang terbaik yang boleh menentukan kesejahteraan kita secara berterusan.

"Dalam pengajaran kita termasuk di universiti-universiti ialah selain daripada pengetahuan kepada mata pelajaran tertentu, selain daripada pengkhususan kita, tidak kira sama ada dalam bidang kejuruteraan, ekonomi dan sebagainya, kita jangan lupa bahawa kita membentuk manusia dan manusia dengan sistem nilainya (*value system*)," katanya.

Beliau berkata demikian ketika berucap

sempena Perhimpunan Warga UMP Bersama YAB Timbalan Perdana Menteri Malaysia di Majlis Perasmian Karnival Pengajian Tinggi Negara Zon Timur pada 28 Februari 2009 yang lalu di Dataran Canseleri, UMP.

Tambahnya, kalaulah manusia yang kita jana melalui universiti ini, kalau produknya ialah manusia yang mempunyai kelulusan akademik tetapi tidak dididik dengan nilai-nilai yang baik maka manusia itu dengan kelulusan yang tinggi pun akhirnya boleh membawa kepada kesan krisis ekonomi.

"Justeru, amat penting bagi kita untuk membentuk manusia itu dengan sistem nilainya disertai dengan pengetahuannya supaya kita dapat membangunkan bukan sahaja pelajar yang hebat dari segi akademiknya tetapi seorang yang benar-benar terdidik.

"Orang yang benar-benar terdidik inilah yang negara kehendaki ke arah menghadapi dan menangani cabaran-cabaran yang lebih besar yang menanti kita," ujarnya.

Beliau turut menekankan tiga komponen pendemokrasian pendidikan, pertama ialah akses kepada pendidikan mesti dibuka seluas-luasnya, kedua ialah akses kepada pendidikan yang berkualiti dan yang ketiga ialah mesti adil dan saksama.

Jelasnya, melalui prinsip pendemokrasian pendidikan, ia terbuka seluas-luasnya dan Malaysia merupakan satu-satunya negara di kalangan negara sedang membangun yang boleh bangga bahawa Malaysia mengamalkan dasar yang amat-amat adil dan saksama.

Beliau turut memberitahu kepada warga UMP bahawa *empowerment* kepada universiti amat penting dan dengan autonomi yang diberikan setakat ini menunjukkan prestasi yang membanggakan dan menggunakan autonomi ini dengan penuh rasa tanggungjawab, kerajaan akan tambah lagi *empowerment* ke universiti.

Justeru, jelasnya lagi, jika universiti-universiti menggunakan *empowerment* dengan

sebaik-baiknya, kalau diberi peruntukan pembangunan di penyelidikan (R & D), tidak perlulah semua peruntukan itu digunakan untuk membuat lawatan ke luar negara.

"Bukan tidak boleh melawat ke luar negara tetapi kalau boleh buatlah penyelidikan di Tasik Chini umpamanya dan tidak perlulah pergi ke Tasik District di United Kingdom.

"Kalau universiti sudah ada kuasa, ia akan menjadi lebih *motivated*. Rasa terpacu dengan semangat yang lebih berkobar-kobar untuk melakukan perubahan demi perubahan untuk menjadikan universiti sebagai pusat kecemerlangan ilmu dan bersaing dari segi *world rankingnya*," ujarnya.

Beliau turut berbangga dengan perkembangan UMP dan berharap UMP akan memberi kesan kepada masyarakat.

"Memasyarakatkan universiti merupakan salah satu agenda universiti-universiti kita dengan turun ke kampung-kampung, membuat penyelidikan dan sebagainya.

"Ini adalah antara tanggungjawab sosial yang perlu kita lakukan dan kepada pelajar-pelajar universiti gunakanlah kesempatan ini dengan sebaik-baiknya dan pindaan kepada Akta Universiti & Kolej Universiti (AUKU) yang dibentangkan oleh Yang Berhormat Menteri Pengajian Tinggi telah memberi kita lebih kebebasan kepada pelajar untuk berpesatuan dan sebagainya.

"Mudah-mudahan ini akan menambahkan lagi pengetahuan kita dan menjadikan kita sebagai bakal pemimpin masa depan untuk negara kita," ujarnya.

Turut hadir Menteri Besar Pahang, Yang Amat Berhormat Dato' Sri Adnan Haji Yaakob dan Menteri Pengajian Tinggi, Yang Berhormat Dato' Seri Mohamed Khaled Nordin, Pengerusi Lembaga Pengarah Universiti, Yang Hormat Dato' Mohd Hilmey Mohd Taib dan Naib Canselor UMP, Yang Hormat Profesor Dato' Dr. Daing Nasir Ibrahim. Timbalan Perdana Menteri juga telah dibawa ke Bilik Senat untuk mendengar Taklimat Tertutup yang disampaikan oleh Naib Canselor.